

# Ephesians

*Paul Bimbom Nahni Djurra Bedberre nawu  
 Birrini kore Kunred Ephesus  
 Ephesians 1:1-2*

<sup>1</sup> Ngaye wanjh Paul ngabimbom nahni djurra ngudberre. Ngaye ngayimerranj apostle nuye Christ Jesus kore God djareminj ngardduk. Ngaye wanjh ngamunkewe naninjnanu djurra ngudberre nawu God nuye bininj ngurrihni kore kunred Ephesus. Ngudda wanjh ngurrikukbelbmerrinj kore Christ Jesus dja munguyh ngurridjalmunkekadjung. <sup>2</sup> Ngaye ngadjare God nawu Kornkumo kadberre dja mak Jesus Christ nawu Kawohrnawu Rowk, bu ngundiwernhkongibun, dja mak ngundiwon kunmodmikenh.

*Bu Kuhni God Yingkihkarremarnbom Kore  
 Jesuskenh  
 Ephesians 1:3-14*

<sup>3</sup> Karriburluburlumen nawu God! Jesus Christ nawu kanmarnewohnan kadberre wanjh kabiyimarneyime God bu Kornkumo nuye. Nungka wanjh kanmarnbom bu karrikukbelbmernen nuye Christ, dja kunmekbekenh kunu kanwong nawu Namalngmakkaykenh ba bu karrimang kunmakmak rowk kore kaddum heaven. <sup>4</sup> Kunyungkiah bu God minj bangmebolkmarnbuyi kondah kurorre, wanjh bu kunmekbe bolkyimi, nungka yingkihkarremarnburrinj bu kankukbelbme kore Christ, ba bu karriyimerran

djal nuyekih bininj nawu nungka kandjalmakwan kore kumirrk nuye.

Nungka wanjh kanmarnedjareminj kadberre.

<sup>5</sup> Dja kunmekbekenh kanmarneyingkihkarremarnburrinj bu kanmarnbun karribebeywurd nuye, kore karrikukbelbme nawu Jesus Christ. God kuninkunu djareminj bu djal nungan kanjilngmarnburren. <sup>6</sup> God wanjh kuninkunu kanmarnekurduyimeng rowk ba bu karriburlume nungka nawu nadjalmakkaykenh dja narrulkarrekimuk kore wernhmimkongiwern duninh, dja kunu nungka kanwong bu djal burudjang ba bu karribelbmerrinj Jesus Christ nawu nungan God kabimarnedjare. <sup>7</sup> Nungka kurlbawarrhmeng kadberre ba bu kanbebkeng kore kunwarre karrihbongdi. Ngayime bu God kanmarnebengmidjan kadberre kore kunwarre karrihyime. God burudjang djalkurduyimeng bu wernhmimkongiwernminj kadberre. <sup>8</sup> Nungka wanjh kuhni kunmak kanmarnekurduyimeng bu kunkimuk duninh, dja mak kanmayalibayhkeng ba bu karriwernhburrbun rowk kore nungka.

<sup>9</sup> Bu kuhni wanjh nungka kanbukkabukkang kadberre manbu warlkahwarlkkayindi nuye, ba bu karriburrburrbekkan kore yingkihkarremarnburrinj. Ngayime bu Christ kanmarnekurduyime kunmak kore God kadjare kadberre. <sup>10</sup> Kuninkunu God karremarnbom, bu nungan kamdurndiwe yehyeng rowk kore heavenbeh dja mak kurorrebeh ba bu Christ kadjalwohrnawohrnana rowk. Kuhni wanjh nungka

kayakwon kore kayiburnbunkenh kabolkyime.

**11-12** God kahdurrkmirri dja kamarn bun bu kayimerran nawu yehyeng rowk kore nungan kadjare. Kunukka nungan munguyh kadjalkurdyime kore kakarremarn bun.

Wanjh God korroko kanyingkihdjarrng bom ngadberre nawu Jews bininj dja kunukka ngarridjalyungkikhni bu ngarriwoybukwoni dja ngarrimunkekadjungi nawu Christ. God kuhni kurduyimeng ba bu birridjalwern bininj kabirriburlume bu nungka nawu God nadjalmakkaykenh duninjh.

**13** Mah, wanjh ngudmanwali nawu minj Jew bininj, ngudda wanjh ngurrikukbelbmerrin j nawu Christ bu ngurribekkang kunwok kunwoybuk nuye. Ngudda ngurribekkang kunwok manmak kayolyolme bu God ngunngehkekenh ngudberre. Wanjh ngudman ngurriwoybukwong Christ, dja nungka ngunwong Namalngmakkaykenh nuye, kore kerrngehkenh kanyingkihberreb bom ba bu ngurriwernhburr bun bu woybukkih duninjh ngudda wanjh God nuye bininj.

**14** God kanwon nawu Namalngmakkaykenh kadberre ba bu karriwernhburr bun bu woybukkih nungka kanmarneyingkikhkarrme kadberre kore wokkurmerrin j, dja karridjal madbun kore kayakwon bu kanbebkekenh ngad nawu bininj nuye kore karribongdibeh. Nungka wanjh kuhni kakurduyime ba bu birriwarlahkenh bininj kabirridjalburlume nawu nungka nadjalmakkaykenh duninjh.

*Bu Paul Danginj Yiwarrudj Bedberre Bininj  
Nawu Birriwoybukwong Jesus.*

*Ephesians 1:15-18*

**15-16** Mah wanjh. Ngaye ngamanjbun God bu kunbarnangarrawern kore ngudberrekenh dja mak ngadjaldi yiwarrudj ngudberre bu munguyh. Kuhni ngarredjingmey bu ngaye wobekkang ngudda bu ngurriwoybukwong Jesus nawu kawohrnan rowk, dja mak bu ngurrben-marnedjare birribuyika nawu God nuye bininj rowk.

**17** Ngaye wanjh munguyh ngadjaldi yiwarrudj bu ngahdjawahdjawan God nawu Nad-jalmakkaykenh Kornkumo. Nungka nawu God nuye Jesus Christ nawu kawohrnan kadberre. Ngaye ngadjawan bu ngunwon Na-malngmakkaykenh ba bu ngurrimayalimakmen dja mak ngurriwernhburrbun dja ngurriwern-hborlhme nawu God. **18** Dja ngaye mak ngahdjawan God bu ngunmayalibayhke ngudberre ba bu ngurriwernhburrbun bu yerrekah kundjal-wernhmakkaykenh kambebme ngudberre nawu nuye bininj kore nungan ngunkayhmeng. Dja mak ngurriwernhburrbun bu God nungan kan-won kunmakkaykenh rowk kore kanyingkihber-rebbom ngad nawu bininj nuye.

*Christ Nungan Kadjalwohrnan Rowk  
Ephesians 1:19-23*

**19-20** Ngadjawan mak ba bu ngurriburrbun bu God kahdurrkmirri kadberre kunwernhdulkar-rekimuk dorrengh ngad nawu karrihwoybuk-won nungka nuye. Manmekbe mandjalkarewi

kundulkarre durrkmirranj bu God birrolkkayh-weng nawu Christ kore kundowibeh, dja bikurmeng kore heaven, bu kahyerrkan kore kukun nuye.

<sup>21</sup> Kaluk kumekbe nungka Christ kawohrnan rowk dja kabenyurrrhe birribuyika nawu kabirriwohrnawohrnan dja mak nawu birringeykihkimum rowk, dja mak nawu mankarre kabirrikarremarnbun, dja mak nawu birridulkarrekimuk rowk. Wanjh Christ nuye kunngrey karrokme dja kabenngeyyurrrhe rowk manbu manbubuyika kunngrey bu bolkkime dja mak djalmunguyh. <sup>22</sup> Dja God bimarnekurrmeng yehyeng rowk kore kanjdji kurrenge nuye nawu Christ, dja bimarnbom bu kawohrnan rowk kore nawu birriwarlahkenh bininj nuye kore yiwarrudj ngarre.

<sup>23</sup> Ngad nawu bininj nuye Christ wanjh karri-belbmerrinj karriyimerran yiwarrudj nuye, yiman kayime nungan nuye kunburrk. Nungan naweleng kankukbarlke bu kamngimen kani kore kukange kadberre. Wanjh nahni kunburrk nuye nawu kahdarrkid, wanjh nakka kahdi kore kubolkwarlahkenh rowk kanjdji dja mak kaddum kore nungka nawu Christ wanjh kadjalwohrnawohrnan rowk.

## 2

*God Djalwernhmimkongiwernminj Kadberre  
Dja Kundjalmekbekenh Kannehkheng  
Ephesians 2:1-10*

<sup>1</sup> Ngudda wanjh kerrngehkenhni ngurrimalngdoweng bu ngurriwokweyi God dja mak ngurridjalkurduyimi kunwarre. <sup>2</sup> Ngudda kumekbe ngurridjalkurduyimi yiman kayime birriwarlahkenh bininj nawu kondah kurorrebeh. Dja mak ngurrimunkekadjungi nawu namalngwarre duninh, nawu kabemarnewohnan nawu namalngbubuyika kondanjkunu kurrewaken. Nungka wanjh kahdurrkmirri kore bininj bedberre kukange nawu kabirriwokburriwe God. <sup>3</sup> Ngad warridj, wanjh karrikurduyimi kunwarre yiman kayime bininj nawu kondah kurorrebeh bu karriraworrinj. Ngad wanjh karridjareni bu karridjalkurduyimi kunwarre kore ngadman kunburrk dja mak kore kumayali kadberre. Ngad wanjh karriwarreni, dja karrirohrokni birribuyika bininj rowk, dja kunu God wanjh nungka kandjalwernhdungi kadberre dja wardi kandjalbuyi.

<sup>4-5</sup> Dja burrkyakni, minj nungka kanbuyi kadberre. Ngad wanjh ngokko karrimalngdoweng kore karriwokweyi God, dja nungka wanjh djalwernhmimkongiwernminj kadberre bu kammarnedjareminj bulkkidj duninh, kaluk kumekbekenh bimimbiwong Christ dja kunu ngad dorrengk kandjarrkmimbiwong kadberre. God wanjh djalwernhmimkongiwernminj kadberre, dja kundjalmekbekenh kanngehkeng. <sup>6</sup> Dja mak God kandolkayhweng kadberre bu karridjarkdolkang Christ dorrengk, dja mak kankurmeng kore karridjarryerrkan Christ Jesus dorrengk kore kaddum heaven.

<sup>7</sup> God wanjh kuninkunu kurduyimeng kad-

berre ba bu yerrekah wanh birriwarlahkenh bininj kabirrinan bu baleh nungka kurduyimeng kore kanmarnedjareminj kadberre kore Christ Jesus. Wanjh kunukka kabirriburrbun bu nungka wanh nadjalwernhmimkongiwern bulkkidj duninh. <sup>8-9</sup> Yoh. God ngungehkeng bu djal burudjang ngunkongibom dja mak mimkongiwernminj ngudberre. Bu ngudda ngurriwoybukwong wanh kunmekbekenh nungka ngunngehkeng ngudberre. Minj ngudmandeleng bu kuhni ngunmarnekurduyimerrangimeninj, dja God wanh djalburudjang ngunmarnekurduyimeng. Ngad bininj minj ngadmandeleng karringehkerrimeninj, wanh minj nangale bininj kaburlumerren bu yimankek kangehkerrenkenh. Ngudda minj ngurridurrkmirrangimeninj ba bu yimankek ngurrimarnbuyi God bu ngunngehkeyi. <sup>10</sup> Kaluk God nungan durrkmirranj dja mak nungka djalkurdumak duninh! Dja nungan God nadjalkudji kankangemarnbom kadberre bu kankukbelbmeng kore Christ Jesus, dja kanmarnbom ba bu karrihyidurrkmirrikenh kunmakmak nuye kore nungka kayingkihkarrme kadberre bu kanwonkenh.

*Nawu Christ Kurlbawam Dja Kanmarnbom Bu  
Karridjalkukkudji*

*Ephesians 2:11-18*

<sup>11</sup> Ngudda bininj nawu minj Jews, ngurriburrbu bu kerrngehkenh kore ngurrihkurduyimi. Bu ngudda minj ngundiayibornayi kore Jews bininj. Wanjh kunmekbe ngad nawu Jews

bininj ngundimarneyimi ngudberre, “Ngudda minj ngurrilakkayen!” Dja ngad bininj nawu Jews ngarrimarneyimerrinj, “Ngad nawu ngarrilakkayen!” Bu kumekbe ngad ngarriyimeng, wanjh ngarrikukyolyolmerrinj djal kunburrkwi.

<sup>12</sup> Ngudda ngurriburru bu korroko ngudda minj ngurriraworrimeninj nawu Christ, dja ngurridjaldi djarreh nuye, dja mak ngudda minj bininj nuyeniwirrinj God, yiman ngad bininj nawu ngarringeyyo “nawu Israel kankebmawahmeng”.

Wanjh God wokkurmerrinj, dja nganberreb-bom ngadberre nawu Jews bininj, dja ngudda minj njale ngurrimayi, ngudda yiman nawu ngurribolkbubuyikabeh. Ngudda ngurrihni kore kondah kurorre bu kunnjilngwarre dorrengh, kore minj ngurriburrbuyinj God, minj mak ngurriburrbuyi kore nungka kunmak ngun-marnekurdyime bu yerrekah. <sup>13</sup> Bolkkime wanjh, ngudda nawu korroko ngurridi djarreh nuye God wanjh ngurribelbmerinj kore Christ Jesus. Bu nungka wanjh kurlbawam ngudberre wanjh kunukka ngunkang ngudberre darnkih kore ngad.

<sup>14</sup> Christ nungan kanwong kadberre kunmod-mikenh nuye dja kanmarnbom kadberre kar-rikukkudjihminj ngad bininj nawu Jews dja ngudda nawu minj Jews. Minj karriyawoyhduren dja nungka wanjh bakkeng manbu bulkayh warnahwarnamhyoy manbu kanhbebbehkuk-nami. <sup>15</sup> Ngad nawu Jews bininj wanjh ngarridjalkadjungi mankarre manwern manbu

mankilehkilelk dja mankihkimuk bu ngarrikar-rmi ngadberre. Kaluk manmekbe mankarre kanbebbehkuknameng. Dja bu Jesus doweng kore kundulk cross, wanh nungka bularrbom rowk manbu mankarre, dja kanmarnbom kadberre bu karridarrkidkudjihminj ngad bininj nawu Jews dja ngudda nawu minj Jews, yiman kayime bininj bokenh kabeneraworren dja kabeneylimerran nadjalkudji. Kaluk kankuk-belbmeng kadberre rowk nungka dorreng. Kunukka nungka kanmarnbom ba bu minj mak karriyawoyhdurren dja wanh kanwong kadberre kunmodmikenh nuye. <sup>16</sup> Jesus nadjalkudji kanjkurrmerrinj kore manbu cross kundulk, dja doweng, wanh kunu nungka kanmarnebularrbom kunyid kadberre, ba bu karrimarned-jaremerren, dja mak kandjarrkdurndiweng kadberre rowk kore God.

<sup>17</sup> Christ wanh kumwam yolyolmi kadberre rowk ba bu kunmodmikenh kanwong. Nungka yolyolmi ngudberre bininj yiman nawu ngurridi djarreh, dja mak kore ngad bininj nawu yiman ngarridi darnkih. <sup>18</sup> Christ kuninkunu kurduy-imeng kadberre rowk, wanh bolkkime bu ngad karrihdjarrkkarrme nadjalkudji nawu Namalng-makkaykenh ba bu karridjarrkre darnkih kore Ngabbard God.

*Bu God Kanmarnmarnbun  
Ephesians 2:19-22*

<sup>19</sup> Mah wanh, bolkkime ngad nawu Jews bininj minj ngundiawoyhngeybun bu ngudda

nawu minj Jews yiman ngurridjalwokbuyika duninjh. Dja wanjh bolkkime ngurrimwam darnkih dja karriraworrinj karridjarrkyimerranj God nuye bininj, dja mak karridjalmudkudjih-minj nuye kore God. <sup>20-21</sup> Ngad nawu God nuye bininj ngarriyime yiman kayime kунwarddewardde bu nungka kanbebbehmang dja kankurrmekurrme, kanhmarnbun yiman kayime kunrurrk nuye. Dja nawu apostles dja mak nawu prophets nakka wanjh bedda werrk benyingkihkurrmeng yiman kayime kунwardde kahyo manbu karayekwon wanjh yerreh kunrurrk karrangen.

Jesus Christ nakka wanjh yiman kayime kунwarddekorlh manwarddekuken kore kunrurrk kayirrangenkenh. Bu karribelbmerren kore nungka, wanjh kanbebbekarrme dja kankurrmekurrme ba bu karridjalkudjihmen yiman kayime kunrurrk manbu manrurrdjamun djal nungka nuyekih nawu Kawohrnna Rowk. <sup>22</sup> Ngudda warridj, ngudda nawu minj Jews bininj. Wanjh kuninkunu God kanhmarnbun karridjarrkyimerran walakkiih walakkiih yiman kayime kayirurrdangen manbu kunrurrk kore kahyo God nawu Namalngmakkaykenh.

### 3

*Paul Kabenmarnemulewan Jesus Kore Bininj  
Nawu Minj Jews  
Ephesians 3:1-13*

<sup>1</sup> Ngaye Paul ngabimbun nahni djurra kondah kore jail ngabongdi. Ngaye ngamarnedurrik-mirri nawu Christ Jesus ba bu ngurriwoybukwon nungka, ngudda nawu minj Jews bininj. Dja yikahwi birribuyika bininj nawu ngandibekkang kore ngayolyolmi, wanjh kunu ngandiberlmey dja ngandikurrmeng kondah jail. <sup>2</sup> Ngudda woybukkih korroko kandiwobekkang ngaye bu God nawu kandjalkongibun bulkkidj duninh dja nganmarnbom ngaye bu ngahmarnedurrkmirrikenh ba bu marneyolyolme ngudberre bininj nawu minj Jews. <sup>3</sup> Kuninkunu wanjh ngaye ngahyime. God kumwam nganbukkang kore mankarre nuye manbu warlkkahwarlkkayindi. Dja korroko ngabimbom kunyahwurd ngudberre bu kunmekbe nganmarnekurduyimerranj. <sup>4</sup> Kaluk bu ngudda ngurribimnan nahni djurra, wanjh ngurriwernhburrkburrkbekkan manbu mankarre warlkwarlkkayindi kore Christkenh bu God nganbukkang.

<sup>5</sup> God minj yingkihkarreyolyolmerrimeninj bininj nawu kunkareni birridarrkid. Dja wanjh bolkkime nawu Namalngmakkaykenh nganmarnemulewam ngadberre nawu God nuye bininj nawu apostles dja mak nawu prophets nuye. <sup>6</sup> Kuninkunu wanjh mankarre warlkwarlkkayindi manbu yongohyoy, wanjh bolkkime marneyime ngudberre. Ngudda bininj nawu minj Jews bu ngurriwoybukwon maninjmanu kunwok kunmak, wanjh kunukka ngurrikukbelbmerren rowk kore Christ Jesus. Wanjh bolkkime karrikukkudjihmen ngad bininj nawu Jews, dja mak ngudda nawu minj Jews, dja kaluk

karridjarrkkarrme kore God kanmarnewokkurmerrinj kadberre, dja mak karridjarrkyikadjuren rowk nawu namakmak kore God kanberrebom kadberre.

<sup>7</sup> God nganmarnedurrkmirri kore kukange ngardduk bu kundulkarre dorrengh nuye, wanjh nganmarnbom bu ngamarnedurrkmirri nuye, ba bu ngayolyolme nuye kunwok kunmak.

<sup>8</sup> Ngaye nawu yiman ngamarladj, minj ngakuken bu bedberre bininj nawu nuye God. Ngaye yiman djal yeng! Dja God nungan wanjh nganmarnemakwam bu nganwong ngamarnedurrkmirrikenh nuye. Kuhni bu bolkkime ngaye beng-dayhke ngudberre bininj nawu minj Jews, ba bu ngurriwoybukwon Christ nawu kanwon kunmakmak kundjalwern duninh, kore minj ngad karriwernhburrkburrknan nuye. <sup>9</sup> God nawu kahmarnbun yehyeng rowk, wanjh nganwong bu ngaye ngabenbukkabukkan bininj rowk ba bu kabirriburrbun bu baleh God kahkurduyime bolkkime kore nuye mankarre manbu nungka yingkihwarlkkang kerrngehkenhni, dja kunkuyeng warlkkawarlkkayindi kore nungka.

<sup>10</sup> God wanjh kahdjare kabebukkabukkan nawu kabindiwohrnawohnan angels, dja mak nawu birrikihkumuk nawu kabirrini kore heaven. Wanjh kahdjare bedda kandinan kadberre, ngad nawu yiwarrudj karrikarrme, dja wanjh kabirriburrbun bu God nungka kakarrme kunmayali kunwernkenh rowk.

<sup>11</sup> God karremarbom dja mahni mankarre nuye kahdjaldi munguyh munguyh kaluk nungka kadjalyakwon rowk kore kakarremarnbun.

Kuhni rowk wanjh Christ Jesus nawu kawohrnан kadberre bimarnekurduyimeng. <sup>12</sup> Wanjh ngad karriwoybukwong Christ dja mak karrikukbelbmerrinj kore nungka, wanjh bolkkime minj karriyawoyhkele kore God dja wanjh kamak bu karrihre darnkih kore nungka.

<sup>13</sup> Kunmekbekenh kunu ngaye ngahyime ngudberre, yuwn bu ngurrinjilngwarremen bu ngayekenh kunrayek dja kunyid. Bu ngaye kuninkunu nganmarnekurduyimerranj kore ngadjakbekkan, dja kuhni wanjh ngaye bidyikarrme ngudda ngudberre, wanjh kunmekbekenh ngurrinjilngmaknin kore God.

*Paul Kayolyolmerren Bu Nungka Kahdi Yiwar-rudj*

*Ephesians 3:14-21*

<sup>14</sup> Kunmekbekenh kunu ngayolyolme ngudberre, wanjh ngaye ngabarddurrukkurlhdan kore kumirrk nuye Ngabbard God. <sup>15</sup> Nungka nadjalkudji Kornkumo duninhawu kanmarn-bom dja kanbebbewon kungey duninhawu, ngad bininj rowk kore karribebbehmud karrihni kurorre dja mak kore kaddum heaven.

<sup>16</sup> God nungka nawu namakkaykenh dja kakarme kunwern kunmakmak, wanjh ngaye ngadjawan ba bu nungka nuye Namalngmakkaykenh karrurrkmirri kore kukange ngudberre, dja mak ngunwon ngudberre kundulkarre ba bu ngurrikangemurrngrayekmen. <sup>17</sup> Dja mak ngadjawan Christ bu kamre kahdjalni kore kukange ngudberre nawu ngurridjalwoybukwon nungka

munguyh. Nungka wanjh ngunwernhmarnedjare, wanjh kunukka ngurriyimerran yiman kayime kundulk manbu kahdulkdedjmaddjuh-miyindi kore kahboyoyome, dja wanjh ngurridjaldi munguyh kore ngurriburrbun nungka ngundjalmarnedjare. <sup>18-19</sup> Dja kunu ngaye ngadjawan God bu ngunmarnbun ngudda ngudberre dja mak nawu birribuyika bininj rowk nawu God nuye, ba bu ngurridjarrkburrkburrkbekkan kore Christ nungka ngundjalwernhmarnedjare bulkkidj duninh munguyh munguyh, yiman kayime kaddum dja kurorre dja kubolkwarlah rowk. Kaluk minj djalbininjbeh bu ngurridjallburrbun. Dja mak ngadjawan God ba bu ngudda ngurrikukbarlmiyindan dja ngurriyimerran yiman God rerrih.

<sup>20</sup> Mah, wanjh ngadjare bu birriwern bininj kabirriburluburlume God! Bu nungka wanjh kahdurrrkmirri kundulkarre dorrengh kore ngad kukange kadberre. Nungka wanjh kadjalwernhkurduyime kunkimuk duninh kore minj karridjawan dja mak kore minj karriburrbun. <sup>21</sup> Dja mak ngadjare ngad nawu nuye bininj kore yiwarrudj karrini, wanjh karridjallburrluburlume nawu God. Dja mak ngadjare birriwarlahkenh bininj rowk bu kabirriburluburlume God bu Christ Jesuskenh. Wanjh kunu birridjalburluburlumen God, bu bolkkime, dja mak djalmunguyh munguyh. Amen.

## 4

*Bu Karrikukkudjihmen Kore Nawu Christ  
Ephesians 4:1-6*

<sup>1</sup> Ngaye ngabongdi kore ngandikurrmeng jail bu kunmekbekenh ngaye ngamar nedurrk-mirri nawu Kawohnan Rowk. Wanjh kunu ngaye wernhbengdayhke ngudberre, bu ngudda wanjh ngurrini kunmak rowk kore God kad-jare nawu ngunkayhmeng ngudberre. <sup>2</sup> Wanjh yuwn bu ngurrikimukworren. Ngurridjalmod-mikenhnin dja yeleyeledj kore baleh yarrka ngurriyime. Kab ngurridjalmadburrimen kore ngurrimarnedjaremerren. <sup>3</sup> Dja mak ngurriw-ernhrohrokmen bu ngurridjalkudjihnnin kore Na-malngmakkaykenh ngunmarnbun bu ngunwon ngudberre kunmodmikenh nuye.

<sup>4</sup> Ngad wanjh karriyimerranj bu karribur-rkudji kore nadjalkudji Namalngmakkaykenh karridjarrkkarrme. Dja God kankimey rowk kadberre ba karridjarrkburrbun nawu God kan-marnekurduyime kunmak rowk. <sup>5</sup> Nungka nadjalkudji nawu Kawohnan Rowk, dja ngad karridjarrkwoybukwon nuye. Dja mak kar-rikodjdjuhmeng kore nawu nadjalkudji nuye. <sup>6</sup> God bu nungka wanjh nadjalkudji dja mak nungka wanjh nawu nadjalkudji Kornkumo kad-berre rowk ngad nawu karriwarlahkenh bininj. Nungka wanjh kadjalwohrnan rowk kaddum dja kurorre, dja wanjh kahdurrkmirri kore kadberre bininj rowk, dja wanjh kahdjali kokane kad-berre rowk.

*Bu Christ Kanbebbewon Kore Karridurrkmir-rikenh*

*Ephesians 4:7-16*

<sup>7</sup> Christ wanjh bu djal burudjang kanbebbewong rowk kundjalwern kunmakmak kore

nungka djareminj. <sup>8</sup> Bu kuninkunu wanjh bimbuyindanj korroko kore djurra, wanjh kayime, “Bu nungka dolkkang wam kaddum, wanjh benkang birriwern nawu nungka bendarrkidmey dja bendukkang. Dja ngad nawu nuye bininj, wanjh kanwong kunmakmak nawu kanhmarnekarrmi.” [Psalm 68:18] <sup>9</sup> Kaluk kuhni baleh kakarremenmenyime bu kahyime, “Nungka dolkkang wam kaddum”? Wanjh kuhni kahyime bu kerrngehkenhni nungka koluy werrk kanjdji duninh Kore kondankunu kurorre. <sup>10</sup> Wanjh namekbe nadjalkudjiwi nawu kumkoluy, wanjh yawoyhdurndi kaddum bewh kore heaven, dja wanjh bolkkime nungka kad-jaldi kaddum duninh Kore kubolkwarlahkenh dja kunngol rowk. <sup>11</sup> Nungka nawu Christ, dja nungandeleng wanjh kanwong kundjalmak rowk.

Nawu Christ benmarnbom yikahwi bininj nuye bu birriyimerranj nawu apostles. Dja mak benmarnbom yikahwi birribuyika nuye bininj bu birriyimerranj nawu prophets. Dja mak yikahwi birribadbuyika wanjh benmarnbom bu birriyimerranj nawu kabirriyolyolme manbu kunwok kunmak. Dja mak birribadbuyika benmarnbom wanjh birriyimerranj nawu bininj kabindinahnan dja nawu kabindibukkabukkan. <sup>12</sup> Nungka kuninkunu kurduyimeng rowk ba bu bininj nawu nuye God wanjh kabirridjarrkdurrkmirrikenh dja kabirribidyikarrmerren, ba bu Christ nuye kunburrk wanjh kamurrngrayekmen. <sup>13</sup> Kaluk bu ngad karrimayalikudjihmen kore karridjarrkwobukwon, bu karriwernhbur-

rbun Christ nawu Beywurd nuye God, wanjh kunukka karriyimerran yiman kayime wurdyaw nawu kamhdjaldjordmen wanjh kabalhyimerran kahdabbolkmnen, wanjh kunukka karridjalyimerran bu karrirohrok yiman Christ rerrih.

<sup>14</sup> Bu kunmekbe karriyimerran, wanjh minj mak karriyawoyhmayaliyahwurdmnen kore kerrngehkenhni karridedjingmey karriwoybukwong. Dja wanjh karrimay-alidjordmen ba bu karriwernburrbunkenh kundjalwoybuk kore Christkenh. Dja mak minj karriwokbekkan bininj nawu kanbukkan bu kanhkowekenh dja nawu kabirriwohkur-rehkurren dja minj kabirrimulewan kore kunwoybuk. <sup>15</sup> Dja kunbuyika karriyime, bu karridjalmarneyimerrimen kundjalwoybuk kore karrihwernhmarnedjaremerren, dja mak karrikangemarnburren rowk ba bu karriyimerran yiman karrirohrok nawu Christ. Ngad nawu Christ nuye bininj, wanjh yiman kayime nuye kunburrk. Dja nungka nawu Christ yiman kayime kunkodj yerreh wanjh kunu kanmarnewohrnna ngad nawu kunburkkilehkilelkbubuyika nuye. <sup>16</sup> Ngurriburrbun manbu kadberre kunburrk kakarrme kunkilehkilelkbubuyika manbu kabirriraworren wanjh kabirrimurrngrayek-worren. Wanjh karohrok bu ngad nawu karribelbmerrinj bu karriyimerranj yiman kunburrk nuye Christ, wanjh karriyikarrmerren rowk bu karrimarnedjaremerren. Wanjh kunmekbekenh kunu ngad wanjh bebbehbeh karridjarrkdurrkmirri kore nungka.

*Karrikangeborledkerren Kore God Nuye  
Ephesians 4:17-32*

**17** Mah wanh! Ngaye kuhni wernhbengdayhke ngudberre kore kungey nuye nawu Kawohrnан Rowk, ngurringurdmen kore ngurrikurdyime yiman kayime bininj birribuyika nawu minj kabirriwoybukwon God. Nawu bedda wanh birrimayaliyak dja minj njale kabirriburrbun.

**18** Kuhni wanh kurduyimerranj bedberre bu birrikangerayekni nuye God. Dja wanh birrimayaliburlerranj dja mak birridjalmayaliyak-minj. Wanjh kunukka minj kabirridarrkid kore God kabendarrkidwonkenh. **19** Wanjh bedda yimankek birriyemiyakminj kore kabirrikurdyime kunwarre. Bedda kabirridjare bu munguyh kabirriwernhkurdyime kundjalwarre bu bininj dja daluk kabirrihwohdjirdmarrenkenh. Bu bedda kabirimayaliwarreworren dja kabirridjaldjare munguyh kabirridjalkurdyime kunwarre kunwern.

**20** Ngudda wanh kerrngehkenh minj nguriwernhborlumeninj kuninkunu kunwarre bu ngurribekkang kore Christkenh. **21** Ngudda woybukkih ngurriwokbekkang nawu Christ bu ngundibukkang nungkahkenh kore ngurrimey kunwoybuk nuye Jesus.

**22** Ngudda wanh kerrngehkenh ngurridarkiddi kore kunwarre. Ngundibukkang bu yiman ngurridjalmayaliwerrinj nawu yiman kayime ngurrikangebare kore korroko ngurrikangewarreworrinj bu ngurridjalbekkarrinj ngurrikowerrinj kore ngurridjaldjareni kunwarrekenh. **23** Dja wanh bolkkime ngurribawo

God nungan ngunkangekerrngehme dja ngunmayalikerrngehme ngudberre. <sup>24</sup> Dja ngurriborlhmeng kore ngurrimarnburren bu ngurrikerrngehmen kore God nungan ngunkangekerrngehme ngudberre ba bu ngurriyimerran yiman kayime nungka, dja ngurridjalkurduyime kore nungka ngunmakwan bu ngudda woybukkih djal tuyekih bininj.

<sup>25</sup> Yuwn bu mak ngurriwokkurren munguyh kore ngurridi. Ngad nawu Christ nuye bininj wanjh karriمارneyimerrimen kunwoybuk dja wanjh ngad kunu karriburrrkudjiwi rowk kore nungka.

<sup>26</sup> “Bu ngudda yiyiddung, yuwn bu yikurdume kore kunwarre. Dja yuwn bu yidjalkangeyidbabi bu yiyiddung munguyh. Kaluk bu karrungyibme, wanjh ngurridjalgawo.” [Psalm 4:4] <sup>27</sup> Dja yuwn bu ngurrikimang nawu Namarnde Duninh bu ngurridi.

<sup>28</sup> Ngudda yikahwi nawu kerrngehkenhni ngurridjirdmangi njalehnjale, wanjh ngurribawo, dja ngurridedjingma ngurridurrkmirri kunbidwi ngudberre, ba bu ngurrimang kungwardde kore kunmakkenh. Kaluk wanjh ngurriweykan bedberre kore birribuyika bininj nawu yiman kayime birrimarladj nawu minj birrikuken.

<sup>29</sup> Dja yuwn bu mak kundjen kunwarre ngurriwokdi, dja kunwok kunmaknin ngurridjalyimerren, ba bu ngurribidyikarrmerren dja ngurrimurrngrayekworren yikahwi ngudberre bininj nawu birrinjilngwarre dja nuk nawu kunrayek kabemarnewernmerren.

**30** Nawu God nuye Namalngmakkaykenh nakka wanjh kani kukange ngudberre kore ngudmandeleng ba bu ngunwernhkarrme kaluk bu kunbarnangarra kore God ngunbebke ngudberre kore kunwarrekenh. Wanjh yuwn bu ngurrinjilngwarrewon namekbe nawu Namalngmakkaykenh.

**31** Yuwn bu ngurrinjilngwarremen, dja yuwn bu mak ngurriyiddurren dja ngurriwirrihmerren. Yuwn bu mak ngurringarlahmikarren dja mak ngurrbenyolyolmerren. Dja yuwn bu ngurridjalburrbun bu ngurriwarreworren. **32** Dja wanjh burrkyak. Wanjh ngudda ngurridjalkongiburrimen dja ngurrinjilngmarnburrimen. Ngurrimarnebengmidjdangerrimen munguyh karohrok bu kore God nungka ngokko ngunmarnebengmidjdanj ngudberre kore ngurribelbmerrinj nawu Christ.

## 5

*Karringunjdjika God Nawu Kanbornang Dja Kanmarnedjare Kadberre*

*Ephesians 5:1-20*

**1** Mah wanjh, bolkkime ngudda wurdwurd nuye God nawu ngunmarnedjare bulkkidj duninh ngudberre. Wanjh ngurriyimerrangimen yiman nungka. Dja ngurridjalkadju yiman kayime wurdwurd kabirrikadjung nawu kornkumo bedberre. **2** Dja munguyh ngurridjalmarndjare-merrimen yiman bu kayime Christ kanmarnedjareminj kadberre rowk. Kaluk nungka wanjh

kanjkurrmerrinj bu doweng kadberre kore kumirrk nuye God, wanh kuhni bu God njilng-makminj duninh dja kanmarnebengmidjdanj kunwarre kadberre.

<sup>3</sup> Yuwn bu mak ngurriyime kunwarre bu ngurribidyikadjurren bininj dja daluk. Dja mak yuwn bu ngurrikodjkuluwarremen dja mak yuwn yehyeng ngurrihdjalmanjngun munguyh. Kaluk kumekbe kundjalwarre duninh, dja yuwn ngurriburr bun bu ngurriyolyolme kumekbekenh. Ngudda wanh God nuye bininj, dja kumekbekenh kunu minj ngurriyawoyhkurdyime. <sup>4</sup> Dja yuwn bu ngurriyolyolme kore kunwarre warre, dja minj mak ngurriwokmarlelh-marlelhmarren bu ngurrimarneyimerren kore kunwok kunwarre. Bu kulinjkunu minj kumak kore ngudda ngurrimarneyimerren. Wanh kunbuyika ngurriyimen, bu munguyh ngurridjalmanjbu God.

<sup>5</sup> Bu kuhni ngudda ngurrihburr bun kore kuno yobuk. Wanh bininj dja daluk nawu kabene marneyimerren kunwarre munguyh, dja mak nawu kabirrihburr bun kunwarre, wanh minj kabirringimen kore God dja Christ berrewoneng kore kabene wohnnan. Dja nawu bininj kadjalmanjngun yehyeng rowk nuye nabuyika bininj, nakka wanh yiman kabimarneboddan namekbe nawu kadjalmanjngun, kaluk namekbe bininj minj kangimen kore God dja Christ berrewoneng kore kabene wohnankenh. <sup>6</sup> Wanh wo yobukkih, God nungka kadjalwernhyiddung

kabendung nawu bininj kabirrikurduyime kuninjkunu kunwarre. Dja bu nawu bininj kabirridjare ngundikowe bu kabirriyime kamak bu ngurriyime kunmekbe kunwarre rowk, wanjh nakka yuwn bu ngurribenbekkabekkan. <sup>7</sup> Dja yuwn bu ngurriaworren birrimekbe bininj.

<sup>8</sup> Bu kerrngehkenhni ngudda yiman ngurridi kore kubolkmunun. Dja bolkkime wanjh ngudda ngurriyimerranj nawu Kawohnnan Rowk nuye bininj. Wanjh ngurridjalkurduyimen kunmak kore nungka ngunhkangewolkan ngudberre kore ngurrihni. <sup>9</sup> Bu ngunkangewolkan ngudberre, wanjh kunukka ngurriyimerran yiman kayime kundulk manbu kakarrme manme manmakmak. Wanjh kunmekbe ngurrikarrme kunmakmak dja kunwoybuk, dja ngurridjalkurduyime kunmak munguyh.

<sup>10</sup> Kab ngurridjawa nawu Kawohnnan Rowk ba bu ngurriburrbun bu ngurrinjilngmarnbunkenh nuye.

<sup>11</sup> Dja nawu bininj kabirridi kore kubolkmunun wanjh nakka kabirrikurduyime kunwarre. Kaluk bu kunmekbe kabirrikurduyime wanjh minj kunukka kunmak kamarnbuyindan. Dja yuwn mak ngurribenkadjung dja ngurriaworren bedberre dorreng. Dja ngaleng ngurribenmulewa kurobbe bu kunukka kunwarre kabirrikurduyime. <sup>12</sup> Kunmekbe kunwarre bu bedda kabirrikurduyime manmolk, wanjh kundjalwarre duninh. Bu ngad minj mak ngarriwernhyolyolme, wardi kunukka karriyemikaren. <sup>13</sup> Bu karribolknan kore kabolkwolkayindi wanjh karrinan kore njale bu kunmak dja kore

kunwarre. <sup>14</sup> Bu kambolkwolkayindan, wanjh karrikuknan njalenjale. Kumekbekenh kunu bininj kabirriyime, “Yirrolkka, ngudda nawu yihkeyo! Wanjh yimdolkka kore yirrowengbeh! Kaluk Christ ngunmarnebolkwolkan!”

<sup>15</sup> Mah, wanjh ngurrinahnarrimen kore ngudda ngurrikurduyime. Yuwn bu ngurriburrbun yiman birribuyika bininj nawu birrikodjkuluwarre. Dja ngurridjalkurduyimen kore bininj yiman kayime nawu birrikodjkulumak.

<sup>16</sup> Yuwn bu munguyh ngurribolkmang, dja ngurridjalmarnedurrkmirri nuye God munguyh. Dja kuhni wanjh bolkkime bu kunwarre kah-wernmerren bu kamhbebmerren. <sup>17</sup> Wanjh yuwn bu mak ngurribalkodjkuluwarremen, dja munguyh ngurriburrburkbekka kore God kad-jare.

<sup>18</sup> Dja yuwn bu ngunkangebarlke manbu manbang manbu ngunmarnbun ngurriworromkan dja ngurrikurduyime kunwarre. Dja ngaleng ngundjalkangebarlkemen God nuye Namalng-makkaykenh.

<sup>19</sup> Dja bu ngurriwokdi ngurrimarneyimerri-men kunmakmak kore ngurriwayini Psalms dja mak hymns dja mak mankong manbu God ngunwon. Ngudda ngurrimarnewayini kunkange dorrengħ kore nawu Kawohrnan Rowk. <sup>20</sup> Munguyh ngurridjalyimanjbu yehyeng rowk God nawu Kornkumo kore kunngey nuye Jesus Christ nawu Kadjalwohrnan Rowk kad-berre.

*Bu Karridjarrkmarrkang Nawu Christ  
Ephesians 5:21-33*

<sup>21</sup> Yuwn bu ngurribebbeh dokmiwerren, dja wanjh ngurrimarrkmarrimen kore ngurridjal-marrkmang nawu Christ.

<sup>22</sup> Ngudda nawu ngalbihbininkobeng, wanjh ngurrbenwokmarrkma nawu nabihbininkobeng ngudberre yiman bu kayime Christ ngurriwokmarrkmang. <sup>23</sup> Dja nawu nabininkobeng nakka kabiwohrnawohrnangalbu nuye ngalbininkobeng karohrok bu Christ kanmarnewohrnangad bininj rowk nuye nawu kanngehkeng, dja kanmarnbom bu karriyimerranj yiman nuyekih kunburrk. Ngad wanjh nuye Church, manbu yiwarrudj duninhj. <sup>24</sup> Ngad bininj dja daluk kore yiwarrudj, wanjh karriwokmarrkmang munguyh nawu Christ, wanjh kunmekbe kundjalkudjiwi karohrok bu ngalbihbininkobeng munguyh kabirriwokmarrkmang nabihbininkobeng bedberre.

<sup>25</sup> Ngudda nawu nabihbininkobeng, wanjh ngurringunjedjika nawu Christ. Ngurrbenmarnedjarenin ngalbihbininkobeng ngudberre wanjh kadjalrohrok yiman Christ bu kanmarnedjareminj kadberre, dja mak kanmarnekanjkurrmerrinj ngad nawu karriyimerranj nuye yiwarrudj manbu Church. <sup>26</sup> Kuhni nungka kurduyimeng bu kunmekbekenh djareni kankangemarnbom ba bu karrikurduyime kundjalmak nuye. Bu karriwokwoybukwong nuye kunwok kunmak, wanjh kunu yiman kayime

kankangedjirridjbom kukku dorrengħ. <sup>27</sup> Dja mak Christ kadjare ngad nuye bininj bu karriyimerran yiman kayime ngalbininjkobeng ngalbu ngalkukmakkaykenh nuye. Dja mak kadjare bu minj karriyawohhkarrme kunwarre kore kukange kadberre, dja wanjh karridjalkangemaknin nuye.

<sup>28</sup> Wanjh kunmekbe kadjalkudjiwi nawu nabi-hbininjkobeng bindimarnedjarenin ngalbihbininjkobeng. Dja mak bindidjalnahna yiman bu kayime bedmandeleng kabirrikuknahnarren. Bininj nawu kabimarnedjare ngalbininjkobeng bulkkidj, wanjh yiman kayime nungan bu kahmarnedjaremerren.

<sup>29</sup> Bininj minj kabirrikukwidnarren manbu kunburrk bedberre. Dja wanjh manme kabirri-worren dja kabirriburrknahnarren. Wanjh kunmekbe kadjalrohrok bu Christ kanmarnekurdyime ngad bininj nawu nuye yiwarrudj duninjh. <sup>30</sup> Dja ngad kunu wanjh karrikukbelbmerrinj dja karriyimerranj nungka nuye kunburrk.

<sup>31</sup> Ngurriburru kore kayime, “Wanjh kunmekbekenh kunu bininj kabebenebawon ngalbadjan dja kornkumo nuye, dja wanjh kabimarnekukkurrmerren kabeneukbelbmerren ngalbininjkobeng nuye bu yiman kabeneburkkudjihmen.” [Genesis 2:24] <sup>32</sup> Kuhni bu ngaye ngahyime kundjalwernhkimuk duninjh kore kahwarlkkayindi. Wanjh kadjalrohrok yiman Christ dja Church nawu nuye yiwarrudj duninjh.

<sup>33</sup> Bonj, wanjh ngaye ngadjare bebbehmarneyime ngudberre. Ngudda nawu binihbiniñ, ngur-

rbenmarnedjarenin ngalbihbininkobeng ngudberre yiman ngudman bu ngurrimarnedjaremerren. Dja nawu ngudda ngalbihbininkobeng ngurrbenwokmarrkma nawu nabihbininkobeng ngudberre.

## 6

*Karribebbehkurduyimen Kunmak Kore Nawu Kawohrnan Rowk  
Ephesians 6:1-9*

<sup>1</sup> Ngudda nawu wurduhwurdwurd, wanjh ngurrbenwokmarrkma ngalbabadjan dja kornhkornkumo ngudberre ba kunu ngurriwokmarrkmang nawu Kawohrnan Rowk. Kuninkunu wanjh kunmekbe mandjad ngurrikurduyimen nuye. <sup>2-3</sup> Ngudda wanjh ngurridjalburrbun kore mankarre kahyo manbu kayime, “Ngurrbenwokmarrkma ngalbabadjan dja kornhkornkumo ngudberre. Bu ngudda ngurbenwokmarrkmang, wanjh ngunmarnekurduyimerran kunmak dja ngurrini kunkuyeng kore kondanjkunu kunred.” [Exodus 20:12] Maninjmanu mankarre wanjh manyungkih manbu kamarnewokkurrmerren bu kanberrebbun kadberre.

<sup>4</sup> Dja ngudda nawu kornhkornkumo, yuwn bu ngurrbendjurrdjurkwon nawu ngurrbenbornang bu munguyh kabirriyiddungkenh. Dja ngaleng bu ngurrbendjordmiwe, wanjh ngurbenwernhbukkabukkan dja ngurrbenbidyikarmen ba bu kabirriwokmarrkmang nungka nawu Kawohrnan Rowk.

<sup>5</sup> Ngudda bininj nawu birrikihkimuk ngundi-hbongkarrme nawu ngurrbenmarnedurrkmirri yiman slaves kondanjkunu kurorre, wanjh ngurrbenwokmarrkma mandjad duninhj nawu ngundihkarrme, yiman bu kayime Christ ngurriwokmarrkmang. Dja yuwn bu ngurrbenkowe bu ngurridjalkurren.

<sup>6</sup> Ngudda munguyh ngurridjaldurrkmirrin dja yuwn bu nawu ngunmarnewohnan ngunkurdunan bu ngunburlume ngudberre. Dja ngurridjaldurrkmirrin kunngudj dorrengh ngudberre kore nawu God kadjare. Kuninkunu munguyh ngurridjalkurduyimen dja ngad wanjh Christ kanhkarrme kadberre rowk bu karrihmarnedurrkmirrikenh yiman slaves nuye. <sup>7</sup> Ngurridjalmaknin kore ngurrbenmarnedurrkmirri nawu bininj, yiman kayime bu ngudda ngurrimarnedurrkmirri nawu Kawohnan Rowk. <sup>8</sup> Kuhni bu ngudda wanjh ngurrikarreburrbun bu kuninkunu, nawu Kawohnan Rowk wanjh yiman kayime kabewon namakmak nangale bininj nawu kabirrikurduyime kunmak nuye. Bonj, nawu Kawohnan Rowk kabiwon namakmak bedberre rowk, yikahwi nawu yiman kayime kadjaldurrkmirri kore bininj kabirrikarremulewan, dja mak karohrok bininj nawu kahbongdi dja kadjalkurduyime kunmakkenh.

<sup>9</sup> Dja ngudda bininj nawu ngurrbenhkar-rme nawu ngundihmarnedurrkmirri, ngudda warridj ngurrbenmarnekurduyimen bedberre mandjad nuye God. Dja yuwn bu ngurrbendjal-

dung. Ngurriburrbu bu nawu Kawohrnna Rowk kaddum kore heaven, nungka wanjh ngundjarkarrme ngudda dja bedda. Dja nungka ngundjadme ngudberre bu djal mandjad, karohrok bu kabendjadme bininj ngudberre.

*Bu God Yiman Kankukdjongbun Ba Bu Karribun Nawu Namarnde*  
*Ephesians 6:10-18*

**10** Kuninkunu wanjh kunwok ngadjare ngawhmulewan ba bu ngayiburnbunkenh kore ngahyolyolme ngudberre. Wanjh ngudda ngurrikukbelbmerrinj nawu Kawohrnna Rowk, dja bolkkime ngurriwernhkarrmen nuye kundulkarre ba bu ngurrimurrngrayekmen dja kamak ngurridjaldi. **11** God ngunwong ngudberre kunmadj nawu ngurridjongburrenkenh bu nawu Namarnde Duninhkadjarne ngunbun. Wanjh naninjnanu kunmadj ngurridjongburrimen rowk, ba bu ngurridjaldi dja ngurriyurrrhe kore nawu Namarnde Duninhkadjarne ngunbun.

**12** Ngurriburrbu ngad minj karriburren djal bininj deleng, dja ngad kunu karrihburren namarndebuyika nawu kundulkarre kabirrikarrme, dja nawu kabindimarnewohrnna bininj nawu kabirrihni kondanjkunu kore kubolkmunun. Dja mak karriburren warridj nawu birrimalngwarre kore kunngol kaddumkah.

**13** Kunmekbekenh kunu ngurridjongburrimen kunmadj rowk nawu ngurriburrenkenh nawu God ngunwong ngudberre, ba bu kunmekbe kunbarnangarra bu kunwarre kambebme ngudberre, wanjh kunu ngudda ngurridangen dja

minj mak ngunngudjyurrrhke. Wanjh bu kayakmen wanjh ngudda ngurridjaldi kamak kumekbe.

**14** Mah, wanjh ngurridjaldin dja minj njale ngunrokayhwe. Ngurriwernhkarrmen kunwoybuk duninhj nuye God, yiman kayime ngurringardmodukkarren nawu kunngadmonkenh. Dja mak God ngunmakwan ngudberre, wanjh kunu yiman kayime ngurriberekalkbarrkbuyindi nawu wirlmurrng duninhj.

**15** Bu ngudda ngurrikarrme kunwok kunmak manbu kayolyolme God nuye kunmodmikenh, dja munguyh ngudda ngurribenmarneweykan nawu bininj, wanjh kunukka yiman kayime kundengekenh nawu ngurridengedjongbuyindi ba bu minj ngurridengetirrebme kore ngurriburren.

**16** Dja mak kunbadbuyika marneyime manbu kore mankarrekuken kahyo. Bu ngurriwernhwoybukwon God, wanjh yiman kayime ngurrikarrme kubid ngudberre nawu ngurrikandenameerenkenh. Wanjh nawu Nawarre Duninhj minj mak ngunyame bunarra nuye manbu manbirluwoldjen dorrengħ.

**17** Dja mak ngurriburrbun bu God ngungehkeng, wanjh yiman kayime nungan ngunwong nawu ngurrikoddjongbuyindikenh ngunkodjbalħme ngudberre. Wanjh munguyh ngurrikoddjongbuyindin.

Nawu Namalngmakkaykenh ngunwon ngudberre manbu kunwok nuye God. Kaluk maninjmanu kunwok yiman kayime mandjawak

bu karriburrenkenh nawu Namarnde Duninjh. Wanjh ngurrima dja ngurrikarrmen.

**18** Dja mak nawu Namalngmakkaykenh ngunbidyikarrme bu ngurridi yiwarrudj, dja wanjh munguyh ngurridjaldin yiwarrudj kunwernkenh kore God dja mak ngurridjawad-jawan. Mah, dja ngurridjalburrbu munguyh dja mak ngurridjalbengyirrin. Yuwn bu ngurriwarnyakmulewarren. Dja mak munguyh ngurrbenmarnedin yiwarrudj nawu bininj rowk nuye God.

*Paul Yakwong Bimbom Nahni Djurra*  
*Ephesians 6:19-24*

**19** Dja mak ngaye kandidjalmarndin yiwar-rudj. Ngurridjawa God bu nganwon kunwok nuye ba bu ngadjalyolyolme, dja minj mak ngakele bu munguyh ngabendjalmarneyime bininj kore God nuye kunwok kunmak manbu kore yingkihwarlkkahwarlkkayindi. **20** Nungka God nganmunkeweng ngaye bu ngare kubolk-bubuyika, ba bininj ngabenhbukkabukkan manbu warlkkahwarlkkayindi kore Christkenh. Wanjh kunmekbekenh kunu ngaye bolkkime ngahdjaldukkayindi kore prison bu wirlmurrng dorrengh. Dja wanjh ngurridjawa God ngardduk ba bu ngankangerayekwon kore ngabenmarneyime bininj. Kuhni wanjh nganwong ngakarrme bu ngamarnedurrkmirri.

**21-22** Dja ngaye wanjh ngamunkewe nawu Tychicus ngudberre ba bu ngunbengdayhke ngudberre kore ngaye baleh ngakurduyime kondanjkunu kore ngahni. Nungka nawu

ngaye nganedanginj kore Christ, dja ngadjal-marnedjare. Nungka munguyh nganbidyikar-rme kore nganemarnedurkimirri nawu Ka-wohrnan Rowk. Nungka wanjh ngunmarney-olyolme ngudberre ba bu ngunkangemarnbun dja ngurrinjilngmakmen. Kunmekbekenh ngaye ngamunkewe nahni bininj ngudberre.

<sup>23</sup> Nawu ngaye karridangerrinj, kandiwokbekka. Ngadjare God nawu Kornkumo dja Jesus Christ nawu Kawohrnan Rowk bu ngundiwon ngudberre kunmodmikenh dja ngundibidyikar-rme ba bu ngurrimarnedjaremerren kore ngurriwernhwoybukwon nawu God. <sup>24</sup> Dja ngadjare God kabennarnekurduyime kunmak bu kabenkongibun duninh birrimekbe bininj nawu kabirrihmarnedjare Jesus Christ nawu kawohrnan kadberre, bu minj mak kabirringurdke bu munguyh munguyh.

**God Nuye Kunmok**  
**The Holy Bible in the Kunwijk language of Australia**  
copyright © 2018 Bible Society of Australia

Language: Kunwijk (Gunwinggu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-04-22

---

PDF generated using Haiola and XeLaTeX on 11 Nov 2022 from source files dated 19 Jul 2021

1e76c3c7-fc1a-5488-bdac-9a98d749a074